

中國方志叢書·華中地方·第八一一號

據

清·陳蘭森等修，謝啓昆等纂
清乾隆五十四年刊本

影印

江西省

南昌府志

四

成文出版社有限公司印行

南昌府志卷十六

學校二

豐城縣儒學

學宮唐永徽二年遷縣治於章水之東建學於治東南宋

紹興十三年知縣雷繼遠遷建於治東即今所黃彥平記後知

縣胡璉汪若愚余畚劉卿月相繼增拓元至元二十三年

陞爲富州學知州陳元凱修併創江山秀傑樓大德二年

知州姚用中復修揭傒斯記皇慶元年學授李克家增修元末

燬於兵惟大成殿存明洪武元年知州張立重建九年改

爲豐城縣學知縣林弼縣丞何昭善修櫺星門明倫堂後

知縣張敬朱暄推官楊譽先後增修宣德四年布政陳智

檄知縣鄭子朝訓導聶伯埧重修

胡儼記

成化二年主簿黃

燧加修十四年副使洪性檄知縣周芳縣丞朱宣重建基

視舊高增六尺廣增四尺有奇張元楨記宏治七年知縣

劉燧復修十四年知縣何洽改濬泮池添設齋舍嘉靖間

巡撫盛應期叅政徐讚檄知縣李章重新之楊廉記萬厯

間知縣吳達可韓文相繼加修四十二年通判陶以詩購

民居擴其地增建文奎閣明末傾圮

吳道南記

國朝順治十二年知縣宗彝重建十五年知縣何士錦增新之

康熙八年知縣房廷楨十三年知縣莫風鯤十八年知縣

蔡毓華三十三年知縣王鎬四十四年知縣薛景瑩五十四年知縣盧佐斌五十九年知縣王履仁雍正七年知縣楊籤十三年知縣劉象賢均先後修葺盛逢瀾記乾隆四年知縣楊志道倡率合邑捐銀五千兩邑人金華通判李堡捐銀一千兩撤舊鼎新之四十年職員呂仕麟復修

先師廟兩廡制如府學殿南爲龍鳳牌坊上豎大成匾露臺在殿前翼東西爲祭器樂器庫櫺星門在露臺前左爲名宦祠右爲鄉賢祠泮宮坊在櫺星門外泮池在泮宮坊外戟門在泮池前崇聖祠在殿西北明倫堂在殿後尊經閣在殿東北閣前爲魁星閣閣後爲秀傑樓儒學門在戟門之

東儒學署二一在近聖樓前一在西繚垣外大成坊在殿
南屏牆外百餘步跨塘築堤爲址乾隆十七年知縣滿岱
暨邑紳士以修志餘貲購石創建

大成殿奉祀位暨四配十二哲東西兩廡從祀位

崇聖祠奉祀位暨四配東西兩廡從祀位

俱同府學
不具識

名宦祠祀晉縣令雷煥唐縣令柳渾南唐縣令馮儀宋縣
令程璠雷繼遠胡璉劉卿月主簿楊告縣尉宋咸劉幹元
縣令賈全富州尹陳元凱高復李明富州吏目史彬知縣
王英林弼朱諫吳嘉聰鄭子朝尙祝劉燧顧似李廷聰何
洽徐楊先顧九思沈燾李國士馮起綸謝龍文署知縣王

大性縣丞何昭善主簿黃燧教諭鄭嘉璘訓導周鳴鶴
國明知縣何士錦

鄉賢祠祀漢高士徐穉唐王季友南唐王子邛宋知房州
于革提刑劉幹劉充奉節郎盛溫如浙西叅議陸筠太學
生胡大訓鄉舉周諤郎中李秉樂平丞解揚會判鄒邁主
簿熊汝垣崇仁尉孫發元貞文先生揭來成學士揭傒斯
侍郎揭汝明大學士朱善知州劉秩尙書黃宗載徵士甘
惟寅副都御史孫曰良修撰孫曰恭曹壽郎中史安侍郎
丁鉉叅政夏希純知州范衷知府雷誠御史丁俊知府甘
瑛勛教孫昌少卿黃節副使涂謙知府劉華甫徵士丁傑

按察使楊瑄范鏞副使李獻尙書李裕教諭杜立知府楊
崇叅政丁璐侍郎熊懷知府涂觀叅政黃琥副使涂棐游
明尙書楊廉郎中江潭給事中李漢檢討范兆祥御史熊
卓副都御史吳祺贈尙書李萬平贈布政楊璉通判雷述
府尹楊銓員外郎葉釗知府高宇叅政朱槩靈臺郎楊源
中允郭希顏侍郎孫世佑副使范慶尙書雷禮副都御史
徐南金少卿夏棣祭酒胡杰副使李貴知縣李讚檢討李
啓美尙書叩士毅唐大章通政李復陽太僕卿徐鑒李右
諫按察使徐卽登員外楊惟相副使雷化麟僉事李琯通
判楊惟休知縣李惟喬封知縣李萬清贈主事熊廷用贈

中允羅文炳知縣朱道光翰林熊直知縣丁倬兵部尙書
李遂尙書范謙御史李栻都御史李材都給事李東華尙
書李璣知縣羅憲凱尙書唐良臣贈御史徐縞贈副使徐
燧祭酒羅大任按察使僉事羅貴素孫儼翰林徐懋昭知
州杜參學政黎芳知縣黃時濟府尹游季勲知府熊廷相
給事熊維廣熊鳴夏尙書熊尙文知府范梅通判黎汴給
事羅棟布政熊鳴岐兵部職方司黃大受

國朝光祿卿甘文奎贈同知熊駿進士陸履敬贈叅議丁文達
叅議丁蕙贈郎中李深郎中李雲會

忠義孝弟祠祀唐義士傅祁宋承務郎徐子中知茶陵州

黃端卿明刑部尙書丁鉉奉議大夫史安監察御史楊瑄
靈臺郎楊源光祿大夫鄧子龍義夫楊璉孝子涂壽徐濤
楊嗣堯熊州俊熊培赤孫天鳳葉香

國朝贈光祿卿甘文奎孝子黃士宏余友芳周道竣永寧遊擊
周尙功

節烈祠祀本縣節烈婦女已奉旌表諸人

射圃明洪武十年知縣齊景明建亭於廟東正統二年徙
學前五十步宏治元年增建廳俱久圯

弟子員額

同南昌縣學

存貯書箴

同府學

學田明楊文恪廉捐上田三十九畝零丁上舍果捐上田七十四畝零修學田九十八工零係蔣一宗施於大明寺業乾隆十三年歸學收管知縣顧錫鬯從邑人士議以田租爲修理文廟之費十六年蔣一宗復以留贍大明寺田

十七工零併歸修學

以上俱豐城縣志

宋黃彥平豐城縣儒學記先王之教始於家塾而君子之學亦先於父子之仁何哉受中以生親嚴禮具和同其際實惟君師於是制其常產而授之田桑養其常心而申其孝弟自家塾而至於黨庠術序而後國學之政行焉此先王之教也父子之仁移於國則爲君臣之義接於物則爲賓主之禮知人道之可終則終之智之事也知天道之可至則至之聖之事也知之於賢否始條理者也聖人之於天道終條理者也金聲而玉振之此君子之學也孔子曰十室之邑必有忠信如某者焉孟子曰堯舜之道孝弟而已矣蓋使治人以仲尼則可使是民爲堯舜之民是有命

焉若治已以仲尼則君子不謂命也孝弟忠信性成在我
而世有不可以入堯舜仲尼之道則亦自暴自棄而已自
暴自棄者法之所威禮之所不齒二帝三王之治所以人
倫明邦本固以其先後勸沮與後世自恣苟簡者異也紹
興十三年天子中興大學州縣亦往往建學而豐城令雷
繼遠祇德之先因人之願徙學於城東面勢惟新考室加
舊高明宏麗舍奠及時大君師之教令既推而達於士矣
士之所及先務者尚友於一鄉之善士以存者爲未足又
尚論古之人豐城士子千數何所矜式親者疑治達者近
腴嘗相與求諸古人則王季友其庶幾乎博極羣書而孝
經曾不釋手當時公議以風后力牧期之學問淵源於堯
舜仲尼之道不遠矣邑無君子斯焉取斯以古況今後生
可畏願諸生勉之朝於斯夕於斯正心誠意而友先
哲於斯學成行尊祿在其中焉余年無幾幸見之
元揭傒斯重修富州學記上御經筵之明年夏六月濟南
姚侯來爲富州以舍菜禮見於先聖先師祝曰惟夫子之
道參天地配日月用中罔敢知而用中實生齊魯之交密
邇夫子之訓欽承明命來守是州今之州古千乘之國也
敢不敬其朝夕惟夫子之訓是承顧瞻廟學摧陋弗稱曰
余之責也會教授清江陳明之繼至議與志合明年秋大

修孔子廟仍其舊者惟殿若明倫中庸二堂江山秀傑樓
悉改作而有加規制必裁就法度出入必限由正途凡爲
屋幾七十楹又范銅爲七十二弟子及諸賢像以嚴祀事
鑿泮池其前倣古頽宮侯載經載度是董是勞吏忘其私
公勸其勤涉冬徂春用告厥成而命侯斯爲之記在元二
十有三年陞豐城縣爲富州以河東陳侯元凱爲之尹時
科舉廢十有三年矣士失其業民墜其教盜賊滿野竟數
十里不聞雞犬聲陳侯大懼遂修孔子廟建小學日集文
儒故老講求治要悉資以爲政不數月境內大治知所務
也今科舉旣復亦十有三年而侯實來當天下文明人復
其業猶皇皇焉汲汲焉以興學校明教化爲先務者其守
同其志亦同也夫兼有天下父師之責者君也承君之志
行君之化者宰相與太守也宰相布於上太守奉於下故
人之生也爲之學校以教之設科以舉之必使士有恒業
民有恒志然後聖人之道可明賢材可得而治可成也古
之有天下者莫盛於唐虞三代而不能去學校廢選舉以
爲治秦去之廢之二世而亡雖然君子之學視學校爲隆
汚以科舉爲去就亦異乎夫子之教矣若夫善學聖人者
在畎畝則行乎畎畝在魚鹽版築則行乎魚鹽版築豈待
學校之教而科舉之勸哉然世亦豈能皆伊傅其人而不

爲之教與勸也此上之志而侯所以力行之者况上方親御講筵詳求聖人之治愚雖不敏願與學孔子者共勉之侯廉慎簡正不爲盛名而人敬畏之蓋賢守云

明胡儼重修豐城縣學記豐城縣儒學重修訓導聶伯埏具其興作本末求爲記按學舊在縣東南宋紹興中邑令雷繼遠徙於郭之東廣五畝有羸厥後唐容劉卿月宰邑復益之容撥浮圖絕產以廣教育卿月拓范氏之壤以充直舍元初縣令陳元凱又重修之殿堂祠宇齋舍書樓各奠以位後皆燬於兵而禮殿獨存國朝洪武初知縣強立林弼相繼有作而學復興繼而知縣姚瑾作文昌樓三間縣丞何昭善又構隙地以充廣之凡所未備者咸備焉歲久寢入頽敗於學弗稱伯埏率二三弟子員胡綱熊穀陸軾甘節乃言於叅政陳公禧叅議周公頤按察使童公寅副使石公璞僉事黃公察汪公泳彭公森知府任公蕭同知王公庸通判邵公鼎請命於布政陳公智遂命知縣鄭子朝典史趙公僉取邑士夏時傑袁秉彝袁崇政黃勝清鳩工集材次第興作先禮殿次講堂禮殿作於宣德四年五月落成於是年九月講堂作於明年五月七越月而告成是役也伯埏親任其事不憚勞勩及匠石飲食之費有

不足者取諸時傑四人之家資給之至於殿廡戟門文昌樓齋舍庫庖射圃則教諭江振咨於鄭尹趙史復撤其故而更以新規模宏敞締構完美不獨士子得所依歸而邑之人士皆得其瞻仰矣余以衰疾歸老江鄉閒閱郡志於屬邑人物自唐以來惟豐城爲盛夫人物之盛固由於山川靈秀之所鍾苟非教養之有素薰陶之有漸雖有忠信豈能彬彬若是哉此學校之設有功於世而先王之教必自茲始人才造就必自茲出子弟之賢亦必本於父兄師友相與誘掖勸獎磨礪切磋砥以底夫達材成德之地凡若此者又必有賢守令爲之表率則勤惰者有所勸懲觀感者興於禮讓教化行風俗美其所係豈細故哉余於藩憲諸公邑之令佐喜其知政之務學之師友期於慶學之成而於伯埴深嘉其用心之勤也故不慚虛薄而爲之記云

吳道南重修豐城儒學記粵自雙龍氣合而斗牛之分野獨爲江省重乃其含光發耀劒江由名物華天寶又合匡廬豫章之勝於斯乎鍾會夫劒江固豐邑之別名也以一邑而係一省之重則夫縉紳先生偕博士弟子員其於壁宮所爲發祥於斯而毓秀於斯者獨能無重與重之則必思所以妥聖靈於廟推之而若廡若祠總皆此類重之則

必思所以隆師席推之而若齋若舍總皆此類至於聖門
欲其宏敞泮池欲其秘邃文峯欲其對峙又所以聚風氣
壯規模廟與堂胥藉此以重可令其高下失平圯敗弗修
隘焉而不廣者徒狃於因循爲哉豐之學在縣東南自宋
紹興十三年縣令雷繼遠卜遷於城之東意是時文廟規
制豈不大備奈僅存古碑二座宋儒章瑛所譔及元人詔
碑一道皆剝落不可句斷白勝國以迄於今三百數十餘
年所以朽蠹之處勢將壓焉懷深恤者疇不知舊貫之難
仍而欲急爲改作計第易稱革故鼎新而又曰革言三就
乃知廢舉之間誠未易以輕談人存政舉端有所待適郡
侯別駕陶公來署茲邑因諸生之請徧覽而歛歎久之遂
慨然以興廢舉墜爲已任乃謀之郡守蘓公司理朱公殫
心籌度著爲役書次第上之於道於司以達於兩院不獨
欣然報可且有所專注而功遂舉鄉大夫總議奉行邑簿
鄭汝俊論錢穀夫料平物價掾郎之才者史嘉謀葛孟瑜
鄭炯楊期用夏應瑞董工役公紆紳而主之帑無廢陂田
無益賦戶無增役民無易肆不數月而績用告成先是學
之基前仰後俯茲則門高於衢廟高於門堂高於廟秀傑
樓高於堂以次第增各三尺許曩時廟右偏下於左偏五
尺許今則東西均稱翼如也舊廟材梗楠之類太多古色

工師存其舊者十之三更其新者十之七工之力費惟此
爲鉅廟距戟門三丈餘戟門距櫺星門倍之泮池在焉宏
治門主者易民居數區遷泮池櫺星門外制稍擴而廬舍
星稠多猥褻至是復貿民居四十餘區櫺星門廊而南凡
三丈許仍復收泮池門內前有蓮湖自壁宮抵湖可五十
餘丈築牆跨湖抵城下迴視壁宮似從人間望天上已而
方闢突門置城臺一座臺上施屋兩楹高曠敞豁洵日送
江山手可星辰摘也蓋亦巒序一大觀焉城之外復有橫
塘遶之自東而西掖以墩阜百斤湖距學十里龍霧洲距
學三十里各爲塔相望莫於吳艮之方文筆冲霄若與斗
牛之文相輝映繼自今蘊隆鬱勃彬彬然應期而起其所
稱地靈人傑寧獨冠我江右已哉是役也形家余君灼言
之三十年之前當茲規畫皆其神眸獨運云先後視成事
邑鄉紳先生胡公緒李公廷謨李公琯范公梅郭公禹臣
劉公禮林公梅曾公世臣黎公汴徐公卽登熊公秉衡袁
公仕銳蔣公汝湖袁公奎李公右諫宋公良翰雷公映熊
公尙文熊公鳴夏唐公大章熊公廷棟萬公紘譚公之鳳
李公大亨邱公士毅楊公惟相李公漢燦徐公鑒傅公宗
臯朱公孔昭袁公懋爛熊公鳴岐李公九疇雷公文炯同
主之稠源李公琯實領之矢論度工簪筆籌紀則生員楊

惟休丁琳杜彥甘侃孫承紀丁允孚蔣復隆劉廷棟夏樞
 范茂楠也役始癸丑季秋之朔構成季冬之望大備於甲
 寅季秋之末計材用工餼之費四十七百餘金署邑郡侯
 陶公實設助千金以始其事問之邑人言公守清而不淄
 神閒而不擾才運而無跡其能辦此無疑也頓邑侯張公
 以新任至益振偉模辟若樸斲既勤而丹雘塗之也豈非
 輝煌廟貌與黼黻皐猷者預相感召聖人之靈豈有所待
 而然哉既與落成而縉紳先生與夫弟子員乃肅書致幣
 問序於余余惟夫子與夫三千七十之徒講學於洙泗杏
 壇之上何有宮牆何有宗廟之美百官之富也者子貢借
 有形以狀無形乃深歎入門之寡得見之難今夫子之宮
 牆果數仞矣爾多士入其門升其堂其所云富且美者亦
 既見之矣此果爲自得自見矣乎倘若探無形於有形當
 思仲尼萬世以爲士道德以爲基者也有基無壞惟是爲
 務矧爾鄉先輩以理學著劍江四方之人士爭相嚮慕若
 南方鄒魯然道德漸濡無所謂見而知之非若地之相近
 世之相去者比也誠由此以立基而措之爲功業文章節
 義寧不麟麟炳炳大爲俎豆之光哉余願與諸君子共勗
 之陶公諱以詩直隸霍邱人邑侯張
 公諱昌辰浙江臨海人癸未進士